

მეგობრული ჟესტი და... დაკარგული პენალტი

თბილისი. “დინამოს” სტადიონი. 8 ნოემბერი.

“დინამო” (თბილისი) – “შახტიორი” (დონეცკი) 1:0 (0:0).

“დინამო”: ურუშაძე, ბ. სიჭინავა, ჭელიძე, შერგელაშვილი, პეტრიაშვილი, ხართიშვილი, ილიაძე, დათუნაშვილი, მეტრეველი, იამანიძე, მესხი.

“შახტიორი”: კორტკიხი, სოროკინი, ზიმა, სალკოვი, დროზდენკო, მიზერნი (პილიპჩუკი), სტანკიავიჩუსი, ბარდემინი, ანანჩენკო, ევსეენკო, ფადეევი.

მსაჯი ვ. ბაბუშკინი (მოსკოვი).

დუბლიორები – 0:0.

მატჩის დღისთვის თბილისის “დინამოს” ერთობ არასახარბიელო მდგომარეობა ჰქონდა ჩემპიონატის ცხრილში: იგი “სადღაც” შუაგულში იმყოფებოდა. მაგრამ გარკვეული პერსპექტივები მას მაინც გააჩნდა: წინ არის გადამწყვეტი მატჩები და მასთან ერთად მარაგიც, რომლის შესაფერისი რეალიზაცია ჩვენს გუნდს საშუალებას მისცემს მჭიდროდ მიუახლოვდეს მოწინავე ჯგუფს.

სწორედ ერთ-ერთ ასეთ “სარეალიზაციო” მატჩს წარმოადგენდა შეხვედრა დონეცკის “შახტიორთან”, ეს გუნდი ჩვენზე წინ იმყოფება სატურნირო ცხრილში და გარდა ამისა, მან პირველ წრეში მოუგო თბილისის “დინამოს” (1:0). ამიტომ დინამოელებს სრული საფუძველი ჰქონდათ ეფიქრათ რევანშზე.

თამაშის დასაწყისმა ნათლად ცხადყო, რომ თბილისელები სერიოზულად იყვნენ განწყობილი სარევანშოდ. პირველივე 10 წუთის მანძილზე “შახტიორის” დაცვამ და მეკარე კოროტკიხმა ნამდვილი შტურმი გადაიტანეს თავიანთ საჯარიმო მოედანზე. ამასთან, სტუმრების კართან მოწოდებულ იქნა კუთხურების მთელი სერია. ფორვარდებს რომ თავი დავანებოთ, შეტევაში აქტიურად მონაწილეობდნენ ნახევარმცველები ხართიშვილი და ილიაძე, ხოლო ბ. სიჭინავა სისტემატურად გადიოდა გარღვევაზე მარჯვენა ფრთიდან, საიდანაც მაღალ ბურთებს აწვდიდა კარის წინ. სოროკინი აშკარად ვერ უმკლავდებოდა მესხს. აქეთა ფლანგიდანაც საკმაოდ იყო გადაცემები ცენტრში. მაგრამ “დინამოს” იერიშს აკლდა მხოლოდ ერთი: ზუსტი დაბოლოება. კარგად გათამაშებული კომბინაციები და გარღვევები ფუჭად იკარგებოდა უმისამართო დარტყმების გამო. “შახტიორის” სახიფათო, მაგრამ მაინც ეპიზოდური კონტრშეტევები ვერ ცვლიდა საერთო სურათს.

გამარჯვება მოვიდა მხოლოდ მეორე ტაიმში. მესხის მორიგი გარღვევა 56-ე წუთზე დამთავრდა შორეულ ძელთან ჩაწოდებული ბურთით. დათუნაშვილი ძალზე ძნელ მდგომარეობაში იმყოფებოდა, მაგრამ ჩვეულმა ინტუიციამ მას არც ამჯერად უღალატა და გოლი გატანილ იქნა – 1:0.

ეს გამარჯვება თბილისის “დინამომ” მძიმე ბრძოლაში მოიპოვა, თუმცა მას რეალური შესაძლებლობა ჰქონდა განემტკიცებინა იგი. მატჩის დასასრულს დათუნაშვილი კარგ პოზიციაში გავიდა მესხის მიერ გადაწოდებული ბურთით და სალკოვმა ზედ კარის წინ მოცელა დინამოელთა მთავარი ბომბარდირი. მსაჯმა უყოყმანოდ დანიშნა პენალტი.

გასაგებია ის მეგობრული ჟესტი, რომლითაც გუნდის წევრებმა მიმართეს დათუნაშვილს. მართალია, იგი არაა პენალტისტი, მაგრამ მეგობრებმა, ბუნებრივია, კოლეგიალური წინადადებით მიმართეს ჩემპიონატის ერთ-ერთ საუკეთესო სნაიპერს შეესრულებინა 11-მეტრიანი: გაიტანე ეს გოლი და პირველი სნაიპერი ხარ! მაგრამ დათუნაშვილმა იჩქარა, ვერ გამოზომა დარტყმა და ბურთი კარს ააცილა. ახლა იგი კიველ ა. ბიშევეცთან ერთად იყოფს ყველაზე შედეგიანი ფორვარდის წოდებას.

ბ. ქორქია.

“ლელო”, 10 ნოემბერი, 1966 წ.